

不具者子何故乃不知是乎其冥冥何劇也
愚蒙未志開得天師解之昭然行子亦易示
矣行努力勉之凡民各有所職乃復為天使
物敢獨自勞自然也不敢不敢行去矣

經文部數所應談第一百六十七


天數之始也是故天地未分之時積氣都合
為一分為二成夫婦天下施於地懷姙於玄
冥字為甲子布根東北丑與寅始見於卯畢
生東南辰與巳垂枝於南養於午尚老西南
未與申成西方日入酉畢藏西北戌與亥故
起數於一十而止十者十之始五行之本
也數以一乘十百而備是也故天生內百日
故畢終是故斗建於辰破於戌建者立也故
萬物欲畢生破者敗也萬物畢死於戌數從
天地八方十而備陰陽建破以此往來復其
故隨天斗所指以明事吾書乃為除害氣故
象天為法

右問天師書文徵信明訣

太平經卷之一百二

太平經卷之一百三

虛元無為自然圖道畢成誠第一百六十八



虛元者乃內實外虛也有若無也反其胞胎
與道居也獨存其心懸龍應也遂為神室聚
道虛也但與氣游故虛元也在氣與神其餘
悉除也。以心為主故得無邪也詳論其意毋
忘真書也。得之則度可久游也何不趣精反
與愚俱也。凶禍一至被大災也棄其真朴反
成土灰也。賢者見書誠之誠之

右虛元之室




無為者無不為也乃與道連出嬰兒前入無
間也。到於太初及反還也。天地初起陰陽源

也入無為之術身可完也去本來末道之患
也。雖其太初難得完也去生已遠就死門也
好為俗事傷魂神也。守二忘一失其相也。可
不誠哉。道之元也子專守一仁賢源也。天道
行一故完全也。地道行二與鬼神隣也。審知

無為與其道最神也。詳思其事。其人先也。閉
子之金闕。母令出門也。寂無聲長精神也。神
氣已畢。仙道之門也。易哉。大道不復煩也。天
道無有親歸仁賢也

右無為



自然之法乃與道連守之則吉失之有患比
若萬物生自完一根萬枝無有神詳思其意
道自陳俱袒混沌出妙門無增無減守自然
凡萬物生自有神千八百息人為專故可不
死而長仙所以蚤終失自然禽獸尚度況人
焉。愚者賤道志下與地連仁賢貴道忽上天

